

Su Sulat ni Pablo dini TITO

Mendadi, kini si Tito, sala di ngag limbang ni Pablo begudiin. Su kekpetuud ni Tito, begu getaw pain, laak nda' maiben, mibaal kaunutan nu nga samasakupen. Binilin ni Pablo ditu pulu' Creta, adun megabang di nga pikumpungan nu nga sakup ni Kristu dia. Piwitan ni Pablo sinulat kini, pu' adun titulu' ni Pablo sa' ta' alanduni gempia pegbetaden nu nga pemili'en kaunutan di nga pikumpungan nu nga sakup, muka' titulu'en diniin dadema su gempia pegbetaden nu nga sakup sampay gempia kepemaag di nga memilas.

¹ Dini'a Tito,

Naan si Pablo, tindu'u sesugu'en nu Megbebaya' muka' peneligan ni Isukristu.

Iini tindu'u dun nu Megbebaya', adun penggengeten ku pai kesalig nu nga getaw tindu'en sumakup diniin, muka' pesuun ku dinilan su metuud titulu'an mekatag di kekpetuud ta. ² Puun tu kekpetuud ta, pedetengen nu nga sakupen pu' metubu' ita di nda'i tamanen. Kia, pinasad dinita nu Megbebaya' su nda' pa mbaali gekleb langit bu' lupa'. Naa ndi' metau megbalus su Megbebaya'. ³ Ki pinasaden kia di ketubu', su gendaw bantang pesu-unenen, pisuun tu'u nu Megbebaya' ditu nga sesugu'enen, adun petenday nilan pelum tu nga getaw. Sampay naan, pisaligen dadema dinaan, adun ukitan ku dun dema su nga getaw. Kaas megukitu puun tu kesugu' dinaan nu Megbebaya', su Meglegawen dinita.

⁴ Ya'a Tito, ma'niin ka tantu bata'u puun di keksalabuuk ta di kekpetuud ta.

Penenebiin ku tu Gama' ta Megbebaya' muka' dini Kristu Isus su Meglegawen dinita, begayan ka niin tulung muka' pianan ginaa.

Sug Baalen ni Tito ditug Benwa Creta

⁵ Naa Tito, iini binilin ku ya'a dun ditug benwa Creta, pu' adun peksiba'an mu su nda'u pa metubus peksiba'ay, muka' adun tendu'en mui nga kaunutan nug launan pikumpungan nu nga sakup dia ngag lunsud. Kelelaat, ndi' mu selingaway ki tinitulu'u dini'a kini. ⁶ Ki nga kaunutan nu pikumpungan, iin subayi metendu', su kana' medangat, sala tawan laaki sawanen, muka' su ngag bata'en, mekpetuud ilan dini Kristu sampay kana' ilan megdedengeg mesungal atawaka medupang. ⁷ Kagina megbaya' tu pibaal nu Megbebaya' su meguit tu pikumpungan, subay kana' medangat. Sa'itada, kana' nu mekpelabawlabaw atawaka sempaun, kana' nu megbebulek, kana' nu melisualen muka' kana' nu mauya'anen dumatu'. ⁸ Iin sungkini gempia metendu', su metau menemba' di memenaikan, penggengetenen dig delendemanen su gempia, su metau meguit tug delendemanen, muka' mekesuun, nda'i melamug dun melaat, sampay metau megbaya' di gayaken. ⁹ Subay pektalenteenan gusay nu meguit tu samasakupen su meseligan petenday mesangu' gupia nu titulu'an ku, pu' adun metitulu'en su ngag duma mekatag di metuud muka' pengmetuudanen su nga kuminuntra tu metuud mekatag di gembagel sayep nilan.

¹⁰ Pu' ki nga kuminuntra kia, metiba' mailan. Memilas ilan tu metuud, pegyegaan nilan su nda'i gatagen, muka' peglimbungan nilan su nga samataw nilan. Labi na duuni nga getaw Judea suminakup na dini Kristu kuminuntra tu metuud. ¹¹ Naa, subay pemaag mu ilan, pu' kana' laak

santa' enlangan peglibulengen nilan pebian di nga titulu'an nilan kana' gempia titulu'an. Pektitulu' nilan dun, adun laak tindanan nilan selapi'. Iini melengas, mpiid ilan dun! ¹²Nda' ba metalu' nu suunan, sama nilan getaw Creta, “Ita nga getaw Creta! Belusen ita, maa' ita nu nga malig metetubu', melela' ita, muka' medalu ita maan.” ¹³Metuud daan su tinalu'en kiin. Kaas, subay peligitan niu ilan titulu'ay, pu' adun gempageni kekpetuud nilan, ¹⁴muka' adun ndi' na nilan pektalentenani nga sanya guksugan nu getaw Judea, muka' nga pinalinta nu kilawan memilas tu metuud. ¹⁵Naa, ki mekesuun getaw, pemilangenen mekesuun sug launanen. Su getaw pasi' kana' mekesuun sampay nda' pekpetuud dini Kristu Isus, mekesala' tu Megbebaya', pu' migela' melemu'ayig delendemanen sampay ndi' metau megbiksu' di melaat gulaulanen. ¹⁶Laung nu getaw ma'nia pu' suminambat tu Megbebaya', laak kumalenged melaati gulaulanen, ndi'en sembaten. Mesina dadema muka' memilas gupia tu Megbebaya', ndi'en pa padun megaga baalay su gempia gulaula.

2

Su Melegdeng Titulu'an

¹Laak ya'a, subay petu'un mu su medunut di melegdeng titulu'an. ²Naa ma'antu, su nga megulang laki, titulu' mu ilan diadia pu' subay mekesuun, gembasa, muka' metau meguit tug delendemanen. Telu'ay mu dadema penggengetenen gupia su kesaligen dini Kristu, su kepetailen tug duma, sampay su kektigelen di kelegenayen. ³Ma'antu dadema su nga megulang libun pelum, titulu' mu ilan pu' subay pegbetaden nilan sug leliagen dun su Megbebaya'. Ndi' ilan mpia menlibak, muka' ndi' ilan mpia penenatan meginum. Subay titulu'en

nilan di gempia su ngag libun begu getaw pa, ⁴ adun meglegintau dailan dema mekpetail diadia tu sawanen muka' tu ngag bata'en. ⁵ Titulu'en nilan su ngag libun begu getaw pa, adun meglegintau dailan pagid, diadia megbaya' tug delendemanen, megliaw gupia di melaat gulaula, mekesuun, mektagikul tug baalenen diag balay, sampay petuudenen su sawanen, adun pia taway dun, nda'i getaw mekesudi' di Gempia Petenday pimuun dinita nu Megbebaya'.

⁶ Naa, su ngag laki pelum begu getaw pa, titulu' mu ilan pu' subay metau dailan dema megbaya' tug delendeman nilan. ⁷ Muka' ya'a Tito, baal mu gusay gempia lendasanig lawas mu dig launan gempia pegbetaden. Selian mu mek-titulu', subay pektinantua mektitulu' muka' gembasaa. ⁸ Pektitulu' mu su melegdeng adun nda'i meketalu' pu' kana' daw melegdeng, adun mpiid su kuminuntra dini'a, pu' nda'iduni metalu'en melaat mekatag dinita.

⁹ Naa su nga gulipen, titulu' mu ilan pu' subay petuuden nilan su gegalen nilan muka' peleliagen nilan dig lumaun pibaal dinilan. Subay ndi' nilan sungalen su gegalen nilan, ¹⁰ muka' ndi' nilan pegleksapen elapay sug danu gegalen nilan. Segaga penemalan nilan petuuday su gegalen nilan, adun mpaita' nilan pu' meseligan ilan gusay muka' mekesuun. Ki tiba'anen kia, pu' adun mesuunan nu nga getaw pu' melengasi titulu'an ta mekatag di Megbebaya', su Meglegawen dinita.

¹¹ Ma'antu, titulu' mu su nga samasakup mu, pu' su tulung nu Megbebaya', biwasanen na adun mesu'at na megawen su kelaun kilawan. ¹² Pebian di tulungen, miktitulu' dinita su Megbebaya' pu' belengen tai pigbetad ta mpauk dun su Megbebaya' muka' ndi' ta na pekpelasen su melaat gayak ta puun tu kekilawan ta, segaga meglegintau ita meksikesuun muka' meguit ita delendeman ta,

sampay pegbetaden ta sug leliagen dun su Megbebaya' saanan ta sumala megleketubu' di nga kilawan nemun. ¹³ Meglegintau ita dun saanan ta mekpelab di gendaw pedetengen ta medayag na tu'u su kelengas nu pegbaya' nu tampusan Megbebaya' pektemuyen ta, si Isukristu su Meglegawen dinita. Leliagen ita gupia di gendaw kia pu' mateng main. ¹⁴ Si Isukristu kini, bigayenig lawasen matay gumanti' di sala' ta, adun lekaten ita dig launan limbung ta, muka' adun baalen ita niin gegulingen piglegetawanan, mekesuun ita muka' mauya'an ta gupia penggulaulaan su gempia.

¹⁵ Kaas ki ngag launan tinitulu'u kini, titulu'ay mu dun su nga mikpetuud sampay pemaag mu su nga memilas tu metuud, gikteb nu pegbaya' mu. Ndi' mu begay petuyangen ka nu nga mikedengeg dini'a, pia ta' taway dun.

3

Pektitulu' muka' Pegad

¹ Naa, su nga samasakup ta дума niu ditu, pektegyung mu ilan gupia pu' subay petuuden nilan gusay su nga kaunutan meguit dig benwa, muka' adin su gempia baalen, subay mauya' nailan menggulaula dun. ² Titulu'ay mu ilan pagid pu' subay ndi' nilan peksudi'an su ngag дума, pia ta' taway dun. Subay metau ilan mekpepia ginaa nug дума nilan, muka' melilelaaten ilan, sampay mesumaya' ilan di tiba'an getaw. ³ Pu' ndi' ba metuud, begudiin pia ita, metegas gupiai gula ta, mimilas ita muka' piglimbungan ita nug дума? Ma'niin ita gulipen nu melaat gayak ta, kaas nda'i gikteb nu gininisan melaat gulaula ta, ndi' ba? Gebii gendaw sempaun ita muka' mingimbegu ita, binanta ita nug дума, migbanta daita dema dinilan. ⁴ Laak pia ma'antu, ki Megbebaya' su

Meglegawen dinita, duuni gendaw pinita'en dinita sug lelaaten muka' petailanen dinita, ⁵ pu' ginawen ita niin di sala' ta. Ginawen ita niin saba' nug lelaaten, kana' nu gempia gulaula ta. Ginawen ita niin pibian di kepawa' nug Balakat nu Megbebaya' tu kelemu'ay dig delendeman ta, muka' pibian dadema di kebegay dinita nug Balakat nu Megbebaya' begu ketubu'. ⁶ Pu' bigayen dinita tantu sug Balakat nu Megbebaya' pibian dini Isukristu, su Meglegawen dinita. ⁷ Kaas pimilang ita niin mekesuun puun tu tulungen, sampay mpeduunan ita ketubu' nda'i tamanen, su ketubu' pedetengen ta. ⁸ Meseligan tu'ui sinulatu kini.

Naa, ki titulu'an ku kini, mauya'an ku titulu' mu gupia tu nga mikpetuud na ditu Megbebaya', pu' adun pek-talentedenan nilan baalay lelayun su gempia, su melengas muka' su gembagel dademai pantagen dig launan getaw. ⁹ Laak pegliaw mu sug lantugi', su metaas yaga mekatag di gesalan, su سوالan muka' samuk mekatag di Palinta nu Megbebaya' tu nga getaw Judea. Kia, nda'iduni gatagen. ¹⁰ Naa ki mikesaba' di kekpesuay di nga samasakup, pegaday mu. Sa' puli'anen pa dinilan mainsan, pegaday mu pa mainsan peluman. Genat nitu sa' ndi' mesikpa', utiday mu iin di pikumpungan niu. ¹¹ Pu' mesuunan niu, mipenulay main, mpalas diniin su sala'en.

Katapusan Titulu'

¹² Naa si Artemas, sugu'en ku iin meditu ni'a. Sa' kana' ni Artemas, si Tiquico. Sa' mateng dia ni'a, pegdedal-i'a panaw, pu' dia ita peksungkak lunsud Nicopolis, pu' pigdelendemu megbebenwau ditu selian metegdawig benwa. ¹³ Si Senas su gabugadu muka' si Apolos, sa' mpanaw ilan, ebangay mu ilan gikteb nu megaga mu meksangkap dig launan penguiten nilan, adun nda'i ku-lang dinilan. ¹⁴ Su nga samasakup ta ditu niu, subay

meglegintau ilan meksituges menggulaula di gempia,
adun mpegebangan nilan sug дума melauni kulangen.
Sa' ma'antu, duun nai pantag nilan.

¹⁵ Kig launan dumau dini, sinambaya nilan. Sambay
mu dami dema di nga sambat nami miksalabuuk dinita di
kekpetuud ta.

Penenebiin ku, mbianan nug launan niu su tulung nu
Megbebaya'.

Daal daitu.

Pablo

Kig Begu Pasad: Ki talu' nug megbebaya' (Bagong Tipan:
Maayong balita alang kanimo)

Subanen, Central: Kig Begu Pasad: Ki talu' nug megbebaya' (Bagong
Tipan: Maayong balita alang kanimo) New Testament

copyright © 1993 Wycliffe Bible Translators, Inc.

Language: Central Subanen

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 13 Jun
2022

e39efc58-c45f-53c6-990e-d3cd833e20b4